

四庫全書

集部

欽定四庫全書

集部

容春堂前集卷十二

詳校官監察御史臣曹坦

中書臣劉源溥覆勘

覆校官中書臣康儀鈞

校對官中書臣楊世綸

謄錄監生臣顧永涵

謄錄監生臣張德燾

欽定四庫全書

容春堂前集卷十一

明 邵寶 撰

記 一十八篇

漢御史大夫鼂公碑陰記

予既封漢御史大夫鼂公之墓而或者以公在當時以  
言賈禍身被顯戮非君子之所嘉予而不滿予此舉予  
觀漢史公始事文帝屢上書言邊事及賢良對策皆切  
中事機蓋謀臣之雄者迨事景帝首建削弱諸侯之議

以為不如此則天子不尊宗廟不安遽以袁盎之間竟未及施以死蓋公之為謀雖能料天下之變然傷於急銳而不量君志之信否其為心雖出於愛君憂國敢發天下大難之端然未聞聖賢之道而無善處之術蓋為忠而過者則殺身之禍亦其有以取之歟夫忠而至於過過而至於殺身此人臣之不幸而重予之哀者也安得謂非君子之所嘉予而遂已於斯邱之封也哉况君子之忠尤有大且純於此者則斯邱之封夫人可以興

矣此又我政人之體也既以對問者遂書諸碑陰

石固石梁記

有義舉焉其費千金其役千夫使一人為之可乎曰有  
其貲而為義無不可矣然有有其貲而不能為者曰其  
心不好義也有其貲矣其心好義矣又有不能為者曰  
其識不足不知義之所在也然則千金之費千夫之役  
可以一人為之而常難乎其人也許州西北有鎮曰石  
固聚居貿易既繁且豐不啻一大縣然西通密縣諸山

山出泉流為河經其地而東春夏之交水勢衝漫不可  
渡秋冬亦病涉焉有議為石梁者計其費曰必千金計  
其役曰非千夫不可皆相顧變色莫敢先倡義官吳芳  
見而心動焉曰此義舉也吾一人足以為之矣乃召匠  
氏伐石于山採木于林鑄鐵于冶度為梁一高若干長  
若干闊若干凡費白金千兩日役若干夫積若干日為  
夫若干一不煩他人人或助之輒謝不受經始于成化  
丁酉之春訖工於弘治己酉之秋完固壯偉四方之人

車而載者馬而驅者徒而負且携者皆若坦途焉知水之無害而不知梁之為利也所謂千金之費千夫之役芳一人為之不亦難哉芳有其貴而心且好義二者於芳皆不為難獨其識足以知世俗所尚浮屠老子無益之施不若斯梁之能濟人又足以知斯梁之濟也大非區區小惠比者義之所在知而必舉不疑不沮竟底于成斯其為難乎始芳為是舉適予來領郡召而獎之至是以成事告予又加獎焉民之知芳者請為記梁之興

造以張芳之義舉於不朽子嘗至石固登崇岡而四望  
西則韓東則許北則鄭之故墟也昔者子產乘輿濟人  
之地依然如故而世變益遠遺風舊俗無一可問者芳  
也有其貲而心且好義猶若被子產之化而其識又偶  
有以補其所不足吾於是益嘆夫斯人之難而所謂千  
金之費千夫之役一人而為之者蓋不足言也使其當  
子產之時殆必有以旌芳而處之矣子為政六年無患  
於民甚愧子產顧何以處芳哉聊以是旌芳焉



裴晉公祠記

郟城西北五十里有鎮曰裴城唐丞相晉國公討淮西時嘗視師於此後人因以公姓命其城又以命其鎮鎮之中故有晉公祠不知其所創始蓋民之私祀祈豐穰沴往往即焉然非典也吏因攸司葺不葺惟民歲久且敝比寶來守許行縣道祠下慨然感之乃勸其鎮之民其稍為完修建額于門設主于堂舊者以新陋者以雅有所瞻焉又請于巡撫都御史徐公暨藩臬諸公歲役

一人俾繼守勿壞且為定私祀期式主以鄉民耆老有  
行義者而記其事于石某按韓碑元和十二年八月丞  
相某至師十月丞相某入蔡然則公駐茲地僅兩月耳  
非有居守撫治之勤而民之敬愛一至於是豈公求民  
民有私於公哉誠于國故在在而感仁於人故在在而  
乎其車服所臨節鉞所指當有不言而喻者矣然方是  
時獻俘于朝立石記功卒為忌者所中至有斲碑之舉  
抑不知碑可斲而其感乎於人者不可忘也不然一戾

止之間而城曰裴鎮亦曰裴且祠焉至于今者亦獨何  
哉由此觀之則是非之在民者公於在國其在後世者  
公於在當時此理之固然無足恠也竇獨念公之在師  
與賊壘相距曾不數舍而從容暇豫若無事焉一時諸  
從事方且談笑為樂至形之詩咏則公素定之志夙成  
之謀優為之才大受之量皆於是乎見之夫惟素也故  
不可動惟夙也故不可撓惟優也故不可克惟大也故  
不可測是其克成厥功蓋有不偶然者故凡有志經世

之士莫不以公為望烏乎民懷其恩士服其德立於百世之上而百世之下身其地者如見其人焉寶知是祠之不朽也寶知是祠之不朽也於是乎記而復系之以迎送神辭使歌于享辭曰

公將降兮茲城橫風雲兮揚靈繁歌舞兮在庭去千秋兮公如有情蠲我俎兮旨我觥

公奄去兮何鄉焱遠駕兮八荒佇城臯兮徬徨裴之城兮召之棠後千秋兮不忘

省齋記

王君廷貴既作齋於所居之左乃問名於嵩菴俞先生  
先生謂君涉世也久命之曰省君謹承之他日至京師  
謂賓宜為之記夫省之義大矣寶方愧此夫何言哉君  
居瀕太湖請以湖喻太湖者跨常蘇湖三州方數百里  
禹貢書之曰震澤蓋水之險江南未之有加也君嘗觀  
其噴薄雲霧吞吐日月而舟焉出沒於其間者乎方其  
出沒也身與舟俱舟與水俱雖有懼心不知其為險也

及夫在岸而觀焉則見夫舟之在水者俯如偃如突如躍如摧如仆如懸如落如而凡險之狀無不畢具於是自顧其身必謂永矢弗冒焉而或者往往又出於不知其險之地此則忽於省之之過也故夫人之所為有不類是者鮮矣可不省與雖然大川之涉夫人之所不免也理義所在豈當逆料其險而不為之中孚彖曰豚魚吉利涉大川利貞蓋信而至於感豚魚信之至也而又守之以正吉與利也孰禦焉而何險之有然則君子之

道固有在此而不在彼者矣君更以是省之君出望族  
幼嘗被仲父萬松先生之教故行年五十而不忘求益  
云

學古齋記

人有恒言皆曰古今異宜蓋古之道不能行於今猶今  
之道不能行於古也曩爵難以常飲籩豆難以常食弁  
冕難以常服書模篆楷則難於識文擬盤詰則難於喻  
故居今反古君子有戒焉此之謂也今有人焉能以古

之道自居則人皆目之曰此君子也學古者也抑又何  
邪古今所異者世所同者道道之不同非道之失也人  
失之耳懲其所失返其所同此天地之義而吾人之彝  
訓也然自衆人視之則曰古之道如此哉雖口稱之貌  
敬之而實惡其弗已同也一齊衆楚其將若之何於是  
有以古始以今終者其亦難矣雖然古之道有本有末  
同其本不同其末無害於古苟惟末之同而本則舍焉  
此羣議之所由起而古道之所以不復也故善學者得



飲之正雖不壘爵未害乎古之飲也得食之正雖不蓬  
豆未害乎古之食也得衣之正雖不弁冕不害乎古之  
服也得書與文之正雖不篆籀盤誥不害乎古之書與  
文也此善學古者也壯以是始老以是終孰其議之哉  
馮君忠卿以學古名齋請記于寶寶觀君之為諸生為  
國子為邑博士循循然無忤於俗而處已誨人皆無戾  
於道今之道由古之道也其於名齋之義可以無媿矣  
於是乎記

涿州重建戶部分司記

涿有戶部分司舊矣今曷為而重建之也主事陸君士  
弘圖其便焉而重建之也蓋京師西南畿內數百里為  
都司者一為衛者十為所者二皆今所謂重鎮防秋之  
戍歲一集集六月而罷者又以千計軍餉民輸出入納之  
政甚夥於是乎戶部專官以分司之凡郡邑在其地者  
二十有四其廩祿之類皆受計焉歲更一人率以為常  
歷數十年上下稱便獨其居在京師而亟出亟返勢不

能已故巡歷有期弗時則怠是謂遙制稽報有籍弗親則弛是謂虛文二者相仍弊日益滋於是乎有稱不便者陸君既大剗其弊思惟久遠則莫若我居其會由茲以巡則辰發酉至可以定期會由茲以考則甲叅乙驗可以詰蔽欺輸受于民而民便之餉給于軍而軍便之老奸宿蠹將無以容其計者惟涿北去良鄉為里七十三南去保定為里二百西去易州為里百又西去紫荆視易差遠西南去唐視保定差遠去倒馬視唐又差遠所

謂會者莫便於此矧其分司傍近有地可闢欲廣焉以居為力頗易於是始有重建之議乃告我太子少保尚書周公侍郎許公二公曰然君乃謂郝知州某出葦楮餘錢若干以供茲役前為門中為廳左右為序序之西闢門再營一如前制為寢凡益地若干丈屋若干楹不費于公不歛于私不兩月而告成事使來請記寶嘗觀善為政者勤以圖功不知其勞簡以御事不知其逸要於盡職以便上下而已故當其為之不為暫輟不為遐

遺怨有弗恤譽有弗嫌若恫在躬若蠱在家必竭吾心而後已焉此古之道也陸君當積弊之后綜核經理不遺餘力而才以濟之故雖一歲之近而必慮乎百年之遠一舉而軍民兩便其於政也可謂知慕古矣是故修建常事不書茲役也政有所闕故書志事變之端故書將告夫後君子俾勿壞也故書

領菴記

領菴者吾友長沙李君徵伯名其齋者也齋以藏脩而

名以自勵焉徵伯之志也若夫領之為義則吾師涯翁先生庭訓在焉徵伯奉以周旋而猶恐其或忘乃謹屬記于寶寶嘗聞之君子之為學不難於傳而難于領領也者心有所得之謂是有機焉不可以力而強也今夫學必有所從受所從受者吾之師也師之所授者有經有傳皆古聖賢之遺聖賢者亦吾之師也吾受所授於師徒誦者謂之口學徒聽者謂之耳學徒講而且鳴焉者謂之膚學皆有所領而無得於心心之不得雖領猶

無領也夫領亦豈外是數者而超然獨詣哉不外乎是而有得于心由體以措諸用無所往而不得君子之學畢矣領之義其大矣哉然曾之唯與顏之請事同一領也而所以為領者異顏以明健曾以沈潛及其成功則一也故超詣之機出於力而亦不專乎力悠悠焉則荒矻矻焉則苦泛泛焉則浮拘拘焉則固顧瞻喻倚衡運用比斲輪優游涵泳積之平生而一旦得之者蓋亦存乎其人焉爾徵伯天資英邁讀書為儒上師聖賢雖從

事科舉而志不為奪駸駸乎大有所造况先生之庭訓寓於名齋者又如此哉先生道德文章為世所宗蓋不立門戶而聖賢之學實隱然在於其躬天下後世之人皆當師之而况其子哉寶不敏既以請諸先生遂為之記蓋菴無所事記者記領之說菴在其中矣

無錫修縣治記

無錫古望縣也嘗為州今為畿縣治居縣西偏高爽整巖稱其為望自有縣以來徵諸志凡幾修矣乃弘治丁



已進賢姜侯文魁以進士來知縣事師古循吏施于有政越明年戊午侯以政暇觀于治考敞議修曰聽事有堂既修于前人無庸予力惟堂左右有房前有儀門門之側有獄敞而宜修者三爰謀諸僚延問于師生至于民者皆曰惟侯所為侯上其事于府于巡撫于巡按既得請於是節經費羨勸義于富量費計工擇日興事先門次房次獄拓地而廣之房加靚深門加軒宏既各就緒復因餘力濬二井於門屋而覆之以待役且訟者終

事于戒石申明旌善三亭其未宜修者仍之始于己未  
某月再以農輟迄今年秋乃大告成時實有江西之命  
便道謁侯相與達觀之侯指戒石曰訓銘于斯及房曰  
吏于斯及獄曰囚于斯及門曰出入于斯斯吾修之寶  
曰然出入于斯者是惟民瞻其儀不可不肅也囚于斯  
者是惟民命其繫不可不慎也吏于斯者是惟民計其  
防不可不密也訓銘于斯者是惟民明畏其顧諟不可  
不敬也敬民以從訓銘不忽所狎不虐所忘而飾于所

由君子觀厥修可以知政矣若夫井以濟渴屋以廣蔭  
申明以令旌善以風政之不可廢也而皆修之政其可  
知哉實以是賀侯侯遜弗居縣之人請書于碑乃作頌  
曰

天不遠民有戒斯石維石嶷嶷維亭翼翼我侯閱之靡  
朝靡夕左右維史有邈其房有籍以載有牘以藏不愆  
不忘民之紀綱矧茲庶獄或怙或眚漢令戒瘦周刑就  
屏求死於生敢弗重省斯井斯屋非僑乘輿我飲我庇

甘棠之餘樹聲我榜宣令我鐸我新斯亭非自我作  
非自我自我振之禁以吾斷撫以吾慈政吾汝令教吾  
汝師朝躋于堂夕降于庭協恭于民惟史簿丞惟我斯  
所如新我德惟盤銘是則其則維何自新新民刻碑于  
門頌者邦人

長興縣儒學重修記

弘治己未貴溪徐侯浚以進士來令長興明年庚申以  
學之敝請于提學按察副使趙公寬既得報乃修大成

殿及戟門及靈星門新其兩廡修明倫堂新其兩齋又  
新會饌堂及射圃及庫廩庖湑凡有制于學者又明年  
辛酉落成先是我俞先生鎡自丙辰歲蒞茲學事嘗有  
意焉以力未果今是役也侯與其寮協謹畢力工不踰  
年費不竭公勞不厲農式克就緒凡入學者瞻對聖靈  
退而振趨以至藏脩游息皆有其地諸生某等嘉侯之  
功有以成先生之志寓書屬寶載之于碑寶嘗論三代  
之學備矣周衰學廢至秦而極漢唐以來學由人興文

翁韓愈時則以吏陽城胡瑗時則以師皆惟其人然地  
以方殊時以代異故其興也不勝其廢宋慶厯間詔天  
下立學於是其制博且久矣而任人之意又不勝法故  
吏與師者因之以泛繼之以玩名興實廢在在有之今  
學遍天下皇祖有詔象懸籍載萬世允式百年以來所  
任吏師或得不得學之興廢亦惟是焉繫孔子曰為政  
在人學政之大也非人其可哉觀侯與先生之於長興  
其不誣也已使天下之為吏為師者皆如是學何患不

古若哉雖然人才風俗天下之元氣也而學也者實培植之地故今之學以孔子為師六經為業漸磨仁義陶鎔禮樂流而為化成而為器莫不益我元氣實而崇之是之謂興文而應之或并棄之是之為廢而宮廬塗媿之類不與焉子夏曰百工居肆以成其事然則宮廬塗媿固亦不可廢也侯與先生其不負於今之學矣先生已酉鄉進士實嘗受業焉而借書其名竊附臨文之義為天下告爾司訓某某實佐先生故亦書之

慎齋記

台郡多君子吾得與之遊者數人今江西僉憲王君景  
昭則以同官故加稔焉因君而得聞其父封監察御史  
慎齋先生有欲見未能之慊今年冬君以先生壽七十  
與其兄若弟以書相謀謂先生素厭燕樂歌頌之事乃  
舉慎齋名屬某記之將寓歸獻用承志焉是亦所以為  
壽也寶不敏嚮往先生久請因以質之可乎某嘗聞  
學於君子曰敬敬云足矣而又曰慎何居君子之論敬



有曰一者慎其一乎非一而求所以為一也有曰貞者  
慎其貞乎非貞而求所以為貞也有曰莊者慎其莊乎  
非莊而求所以為莊也夫莊也貞也一也舉其一未足  
以盡敬而慎也兼之懼其有不敬也而加之慎則是慎  
也其與夫敬也同實而異名者也故知慎則知敬矣君  
子之學其何以加諸雖然慎有二有慎於事者有慎於  
心者慎獨云者慎於心之謂也慎於心則一而不滯貞  
而不諒莊而不矜有不言言則天下聽之有不行行則

天下信之舍此而徒慎於事抑其次焉者矣先生何居  
先生之父存學公昔與姚文敏公並名有傳在學者嘗  
登正統壬戌進士未授官而卒時先生在襁褓母夫人  
教之既長又稟學於舅氏累試有司時名方隆輒心厭  
聲病棄去不事而躬行以教夫三子者惓惓惟聖惟賢  
是師吾是以知先生之能慎也景昭歷官內外臺卓有  
風裁且極力古義日可推之天下皆先生之功也而慎  
之為效亦著矣先生朝夕顧諟老而不倦有衛武抑戒

之遺意焉淺陋之詞雖未足發抑豈不可竊附於日誦之義也哉是為記

張中丞廟記

張中丞何神也唐睢陽守張公巡也公當天寶亂城守以死且日當為厲殺賊史稱其有保障江淮之功宋南渡後民結社備兵火者在在作公祠以倡忠義祠必厲狀謂之公志錫山之祠豈亦創于其時邪說者謂宋異人盧至柔者於此得泉井而施民以療疾疫遂祠公泉

上俾汲必告以鎮民諱然以泉故禱者日衆其祠視他郡特盛蓋自始祠迄皇明景泰凡若干年矣而耆老有行義者議曰祠必有祀祀弗在典猶弗祀也乃以上請得春秋祭著為令若干年成化某甲子議者又曰祀有典矣而祠以厲附他廟弗經弗專乃卜其東為今廟君子曰是近於義廟成貌公于堂以人易厲衣冠惟時主書其官祝如之榜亦如之君子曰是近於禮夫民祠公有報有祈而禦灾捍患無一日不望於公初何假夫泉

哉然泉之利甚博收而幕則滯勿幕則泛勢必有主者  
而惟公是歸則公之得於人者亦於是乎徵觀一邑而  
江淮之南皆可也氓之無知誣公以厲誠誕且恠然  
厲乎由民弗厲由民民求公殊而公之為民佑者譬之  
茲泉或泥或甃而水固無不在也黜乎厲以從其初如  
是為義如是為禮如泉之潔則源源而來以是求公公  
必享之故泉不必廢也廟與貌不可不正也吾於斯舉  
有取焉昔狄梁公毀淫祠於南方所存者四其一伍員

公之忠於員遠矣而祀由禮義其將與茲泉始終乎是為記

陳氏兩阡記

陳氏兩阡今致政福建左布政使晉菴公賓之所營也公祖墓在惠山葬凡若干世至公父母之喪以隘而卜去二里所曰錫山得吉為阡南鄉合葬如禮至公配之喪又以隘而卜去錫一里去惠三里所得吉為阡東鄉葬左而虛其右公亦將斯樂焉公之父為南靖知縣贈

吏部員外郎某府君其葬在成化甲子文思彭公表之  
公之母封太宜人某氏其葬後府君若干年甲子文肅  
王公表之公之配為封宜人吳氏其葬後太宜人若干  
年甲子某公表之皆碑于墓其在南阡有永慰之堂有  
慶源之橋有福地之門其在東阡有冲和之橋有佳安  
之門有榮恩孝思之堂當其中也題曰壽域蓋尊制詞  
彰寵數反求德善以識久遠之意皆於是寓焉其他規  
構尚多而斯數者大矣先是永慰堂成文懿楊公為記

凡南阡之制畧具而東阡未有記者公此以屬某俾并書之寶嘗觀吾邑西諸山惠為最鉅其形衍迤東出稍伏而起者為錫錫惠之支峰也其秀鍾焉故其為泉源于惠者必經于錫然後會溪入湖而歸于海其發也遠其蓄也深而其匪也旋委有截觀于泉而地之脉蓋可知已公世墓于惠再卜而錫之南三卜而錫之東其世序之相承猶其地之脉也公之先以醇厚立家自府君始顯而大發于公文學政行淵博脩潔望在朝著績在



銓衡惠在藩省未老而請在天下有遺用焉其世德之  
漸底于盛亦猶其地之脉也此豈偶然也哉公之卜地  
惟近之相而吉焉是從未嘗謀諸葬師以要後利而垣  
域從衛封樹表識儀以飾觀度以節力君子謂稱乎其  
德况三地相屬岡連嶺望歲時展掃不出午旦而彼此  
可徧親親尊祖於是為備君子又謂稱乎其序序以經  
之德以本之發乎仁裁乎義而成之乎禮一事而衆美  
畢具焉由是觀之則徵於前者將益宏於後其真可謂

不偶然也已孔子曰墟墓之間未施哀於民而民哀蓋言感也公之為阡訓在其子孫而感在邑里夫復何庸於寶之言哉獨念兩阡并書公之意將以示後有不可已者於是乎記

戶部館題名記

通州倉戶部歲委員外郎一人主事四人或七人或九人監出納之政蓋分理以共成而有紀綱焉者也其所居公館中為團亭有事議焉有客燕焉皆於斯弘治間

有為題名之榜揭於亭楣者始自壬子迄于己未凡六十有八人其字與貫具在可覽也由庚申以來以榜盈故莫之嗣書今員外郎祁君某主事成君某李君某馮君某向君某謂是缺典相與徵諸故籍得人視前榜員外郎多若干人主事少若干人其幾人凡再至總幾十有幾於是予以督漕至通諸君請書歲月因念昔承乏司徒屬於二榜所書舊寮居多昌黎所謂烏得無情者予實有之惟古人一登臨游燕必題其名雖寂寥數字

而千載一日不惟其官惟其人耳况諸君賢勞於國更必以歲情孚誼處禮將道益非尋常簪蓋之比揆以古義欲已於書其將能乎雖然是非不敏所能與也第感諸君意勤不可無復請舉司馬公記諫院語再三誦之

尚德書院祠李忠定公記

慧於錫為名山山之重在泉而幽邃如聽松菴者次之菴之左有茂林脩竹觀者謂為一山之勝吾世墓邇其地舊矣弘治間購于僧而得焉時方考闡宋丞相李忠

定公居錫之故而恨其未之祠也蓋有意於斯者凡十餘年至是幸獲休退而始為堂于竹間以為公祠間嘗登而四顧左右前後無非竹者乃顏其門曰尚德書院若謂竹有君子之德凡觀物者尚之云爾然豈徒以物為哉思古之君子而不可見將誦其詩讀其書以論其世蓋狂斐之志如此粵稽三代以來君子之在錫者以至德則秦伯之祠尚矣儒學如龜山諸賢亦故有祠于學凡我後進皆得拜而瞻之公自其祖由邵武來居生

長宦學於斯至以梁溪自號則固諸賢之儔也况嘗廬  
墓茲山義起之禮顧當後舉哉此吾堂之所以作也今  
夫祠擬諸祭菜則事合稱諸鄉先生則名正肖諸家廟  
舊本則像真實與子弟諸生歲時率以從事庶幾一陟  
降間如與君子周旋交懋厥修以階聖賢之域蓋不知  
道有隆污而時有古今也抑亦自尚吾志而已矣公之  
學吾未知其所從受觀其父母葬銘皆出龜山當亦與  
聞程氏之道者故其建明經畫大抵篤君臣尚氣節達

經權審進退以身任重而不自失焉其忠義激烈千載  
而下猶能使人興起史稱公有諸葛武侯之心而考亭  
朱子序其奏議至以天生弭亂許之即是而觀謂公古  
之君子其不然哉昔朱子以匡廬卧龍菴之名取諸潭  
石遂緣其義為畫武侯于堂君子謂其有異世之感若  
公於此精爽伊邇風聲所及學者有師揆之匡廬蓋為  
感雖同而事則切矣乃若以竹興思實不敏於龍菴之  
說竊自附焉天下之君子當有能知吾過者是舉也吾

甥華珉實任其勞始於正德庚午七夕成於中秋奉安於重九皆不愆其素奠畢小燕客賦淇澳而退

雲田記

雲田者雲南提學按察副使彭公性仁讀書處也弘治間公由武選副郎出守汝州予時承許州乏間因胥會得聞所謂雲田者蓋公世第清江上又十里為別業背連羣峰下面江流而中為平野凡若干畝山水之氣日夕生焉動盪滿盈恍有景象可望可即此其所由名也



客有賦者曰東原有田中維雲雲濛濛兮田昫昫或卜  
其上兮讀且耘一經治兮五穀分江清清兮懷夫君有  
和以興者曰雲之興矣于我媵矣我息我游樂且令矣  
雲之收矣于我疇矣我游我息樂且休矣疇兮媵兮雲  
泱泱兮君子于田樂未央兮又有以比和者曰田兮澤  
澤以稼以穡雲兮駸駸以雨以霖人有道兮天無心儼  
物類兮徵德音田漠漠兮雲深深予聞而感之亦欲和  
焉然無以加也蓋心藏者二十年矣乃者再擢至今官

致其事而歸適予以貴州節過公郡公遂請記因書為  
復公博雅能文而詩逼唐法其居官屢有績效無愧于  
比者之言今其歸也更尋於賦且興者將不知老之將  
至也是為記

仕學齋記

仕而優則學古之道也今之仕而優者亦孰不以學為  
事哉學焉而不如古則亦徒學而已古之學者為己此  
學之道也昔有寒而求衣者二人同適於市一人取布

帛馬曰此足以溫吾體矣其一人陋其朴也則取錦繡而製之他日風雨繼以冰雪錦繡者凍布帛者適不知為己之病也蓋凡為學者皆當戒之而况仕者乎漳浦林魁廷元以進士歷官戶部郎中簿書之餘不廢誦讀人謂仕而知學廷元遂以名齋而請予言為勗予嘉其志作記且銘曰

必有事焉惟仕之謂思不出位我躬之微實叅三材何理不該游心千里寓言一室萬物職職此有敏者鬪靡

誇多如身心何敬哉義哉是之謂學先民有作

曹州新作教場記

曹州教場在城西二里原野之間有阜突成名鳳皇嘴者其故形也環闢其周為畝三百容若干人凡閱陳士卒於斯進退於斯分合於斯因阜而高之堂其上曰全勝翼以兩序帥者臨焉而出號令於斯前于堂為階階前若干步凡稟進止受賞罰於斯降阜而南三百步門焉曰演武阜之東若干步為臺樹旗於斯盡疆而垣焉

夾垣內外樹柳焉周完嚴整而塲之為制於是乎備蓋  
正德壬申春三月實始基之越某月落成經畫而圖功  
者今山東按察使無錫吳公也先是辛未春霸州盜起  
縱橫四出攻劫城邑勢日猖獗廷議以曹古劇鎮其在  
今日齒牙北畿喉襟南服而肘腋河南山東之境實惟  
中原重地宜得文武才畧之臣以憲節往鎮之會公以  
監察御史再起在臺天官卿曰是惟其人乃請命為按  
察副使奉璽書整飭兵備作鎮于曹直隸暨河南諸郡

邑在數百里內者皆受約束公至曹首簡士卒而躬閱  
焉既崇其墉既深其池倡厥勇敢為禦守計甚備顧舊  
有教場在城東以習民壯而狹隘弗稱乃于是焉卜之  
曠然可馳隆然可望畫然而不可犯蓋一舉目而有折  
衝千里之勢縱橫竒正參伍實虛碁布筭列如在指掌  
公臨其堂諭厥吏士從容指揮以伺警報而地之為用  
亦大矣厥既落成知州某以公命用書及圖來請記今  
天下承平久矣武衛惟籍民兵惟名彼盜悍猾敢蔑我

師實是之故公之蒞斯凡閱數月賊不敢遁且屢遺我禽焉蓋公有不可勝者乃不自恃而閱習日勤其慮遠矣推公之意必使凡士卒者惟吾法是懼而不知敵寧賊同死而無同生然後為能師也嗚乎其可謂敏且共矣雖然會而習之存乎地簡而閱之存乎法鼓而作之存乎氣率而示之存乎義勸而休之存乎賞戒而警之存乎罰帥而從之存乎人人重則舉人輕則廢蓋凡事皆然而况教民戰乎予比督運北河及茲省毋南還道

出濟上凡公舉措予審聞之於是賊三至公命騎士邀擊斬若干人俘若干人截若干人有籍紀焉惟人之重允與地稱故能有茲成功知州某奉公命唯謹於是舉有勞焉是為記

東湖書院記

東湖書院者廣東按察僉事梧州吳公廷舉之所建也院在州東門外南臨潯灘二江北負大雲山山之下公三代先塋在焉有水出山半左右夾流至院之前匯而



為池池方四畝曰小東湖者公名之也公之先為湖廣  
嘉魚人嘉魚有東湖既取以名又以扁夫院者蓋示不  
忘其先也抑有尚友之道焉昔宋周元公茂叔嘗濯纓  
江州廬山蓮花峯下樂其水之清也遂寓以濂溪之號  
濂溪出道州去江州幾千餘里蓮峯之水非濂溪之水  
也然自道眼觀之則孔子之所謂逝者如斯孟子之所  
謂有本者如是者固未嘗異也故觀道有術莫切於水  
得於水而不沉於水此有道者之大觀也吾於元公見

之大雲之於東湖其亦類是矣夫公之學道從可知已  
然遠而望其故鄉則得水木之義近而適其先塋則廣  
風木之思傍以招引後學而退將自養焉一舉數得是  
皆道中之事也矧院之為勝負山嚮水草木魚鳥之觀  
日陳于前登堂曠如入室奧如經書圖史取諸左右無  
不應手而樞趨其間皆鄉里秀敏之士士之不遠千里  
東負而至者又時有之以是尚友古人夫豈僭且誇哉  
公博學好古有猷有為由邑而郡夙著名績予蓋聞之

久矣頃者以貳守北上道出江右始因吾寅萬公世和  
得傾蓋焉比任雲間遂命倅來請記時弘治甲子也越  
六年正德己巳乃克執筆蓋院之詳公自有記予特論  
公之志以告學者云

湖廣提學分司題名記

我皇明建學於國初為制最廣且備其設官奉勅以專  
提調自正統戊午始在諸省官列按察初無別署既乃  
有分司之建湖廣之為分司自成化己亥始當是時山

陰薛公綱以副使來任實割府學廟東地為門為中門  
各三間為堂五間為序左右三間為寢如堂而籍藏記  
室附焉後若干年弘治乙丑今僉事廬陵陳君文鳴乃  
闢寢後地五尺疏以受明東于寢為亭以備游詠又因  
中門為貳以節升降以辯出入自正德戊辰始於是公  
歷考前政氏名自劉公虬而下得十有三人疏其履履  
刻于石且虛左以伺將來而分司之制於是乎成則已  
已始始君以進士高第入翰林為庶吉士讀中秘書既

廼官刑部累員外郎被簡為今官士論稱允至則風厲  
施為惟明詔是訓惟正學是崇正道是迪而前乎是者  
之所樹立近著顯效遠流餘風君以是學是道律之則  
固若尺度權衡然有不可掩者夫何待於指其名而議  
焉也哉雖然師擇三人尚友千古古之人用之君亦用  
之君子謂君於是乎博夫正道隱而道其所道正學絕  
而學其所學由衰周至宋枝分派別不啻數百家要皆  
實徵於名其從與否存乎其人典學者不於是立辯焉

則何以崇以迪以奉詔旨然非明諸心體諸身稽古以  
驗諸今雖欲辯之而其惑滋甚是故學不易崇道不易  
迪非正之難知似正而非者之難辯也是故得是者賢  
勉是者次之凡師弟子者之趨嚮往往係焉而其究也  
將被諸海內歷數十世而未已然則提學者之賢否其  
於天下國家也大矣若謂直回忠詐指議於前而勸懲  
於後則固事理之必然而君之意豈止是哉寶昔嘗承  
乏江右蓋誠有媿於斯者茲至湖南而君辱以記屬既

書其事復以鄙見為君誦之觀名者請以是先焉

容春堂前集卷十一



欽定四庫全書

容春堂前集卷十二

明 邵竇 撰

記一十  
七首

總督漕運憲臣題名記

竇承乏憲臣奉勅總督漕運始至淮鎮凡百舉置惟故  
是稽於是案牘山積追考前政氏名後先罔屬然其間  
多名人竇幼學時已志其畧比官戶部所聞漸悉乃今  
得通閱之諸君子者於是無不載焉於乎盛哉仰惟我

祖宗列聖簡任諸臣治茲漕事惟材是屬用底嘉績及其登卿宰進保傅樹勲輔德表表相望寶愚何足以繼之竊嘗考禹貢以水紀諸州貢道蓋後世漕運之端然曰逾汙入渭則取諸陸曰沿海入淮則取諸海其直達帝都者纔三之二若漢以下都關都洛都汴間有直達之漕而為力甚難為費甚鉅故議者往往右轉輸焉其勢然也元都幽燕海陸並運國初猶因之惟我文皇帝肇建兩都始以平江伯陳公瑄工部尚書宋公禮等建

白濬茲漕渠海陸是避萬舟億卒咸建帥長倉支道兌  
常變具宜蓋有得於轉輸之意講求經畫越歷數朝而  
漕法大成國計充預萬世允賴然其為壩為牐閉啓掣  
挽於水性不能無拂焉者是故險雖遠避而勞不多省  
羣衆所聚蠹病亦從而生既命元戎專制其事而提督  
整理間以命諸卿亞厥後遂有總督憲臣之命然時異  
勢殊弊由法起名為轉輸而漸變直達既乃公私交征  
軍疲民困至使論時務者復有于海于陸之思則豈先

朝之初意然哉夫救弊在人不在法持法在心不在迹故必通上下而後為平必體遐邇而後為惠必均夷險達經權而後為貞為哲蓋大臣之道如此漕也者特其一事也具是則舉缺是則廢凡茲前政諸公圖艱應遽保豐持平若有異道焉由今而論其世則固莫之能違矣承繼之責取監之義寶雖不敏於是竊有意焉故具列而刻諸石如其品藻以伺君子志漕運者尚亦有考哉自河州王公竝以景泰庚午來蒞迄今六十年為右

都御史三人左右副都御史若干人僉都御史若干人  
兼巡撫者若干人其三人凡再至統曰憲臣者重勅詞  
也謹記

南京福建道監察御史題名記

正德己巳秋貴溪徐君盈以行人擢南京福建道監察  
御史既上之三月其僚任君賢王君鵬皆有使事出徐  
君署焉政暇閱故牘得前政氏名之悉乃謀諸二君立  
石於堂序書而刻之書來請記歲月惟我朝制天下十

三道道設監察御史數員入則廷規出則方按凡天下事皆得言之是謂風憲與百司體異其在留都務若少簡而建官如故封章馳達人評物議亦往往為公論所屬凡諸君子銜繫官署而名在天下亦何必指議於碑刻間而後知之也哉然論人者必原其初必究其衷必徵於終三者非久莫深非深莫悉夫然故在一時亦有遺論焉而或輒為別白曰此忠此佞此正此邪烏乎可哉必也時移地改生乎後者歷指而叅稽然後其論可

得而定此名之有題所以汲汲於前輩也君子猶以為未盡者謂有鄉評焉有墓碑焉有風謠焉有史傳焉而不止乎是雖然非茲石則氏名不聚氏名不聚則辯論烏乎施况彼數者皆有詞於筆洵武或失之叔段窮奢或失之子儀而隨且隱者又常情所不免也今是石也氏名之下字書貫書出身書歷官書而不書政行若將闕疑以起問設問以待對者而天下之公出焉前監後觀而中以自考於方人得律已之道古之所謂官箴者

金匱要略卷之四  
卷十二  
亦何以加於此哉諸君之名於是乎可徵矣

觀草記

正德壬申春二月予奉詔攝總督事蒞太倉公館館之  
堂後甃砌間有隙土二方皆蓬然枯芟予指而問焉館  
人曰草也今司徒孫公為總督時實種之予曰是何為  
者館人曰公嘗言春夏之交草長數寸碧色可掬晨露  
既晞微風汎之移牀近焉心目之間不知天下之有名  
園奇卉也予笑曰有是哉司徒公之好奇也昔濂溪翁



嘗以草寄意至今傳之公將襲其跡乎不然書曰爾惟風下民惟草公民曹之長也將以是觀民焉雖然草一也亦有以喻夫臣者臣民之分不同而君子之論於是乎異然則公將自觀乎公豈徒玩物者哉越三月草果長如所言館人請觀予既賦觀草之詩呈司徒公復次第前語為記

觀水軒記

觀水軒者二泉邵子所乘舟也邵子既得請歸每出則

與客泛之客謂邵子曰子所謂觀觀淺深以涉乎觀順  
逆以濟乎觀清濁以濯乎三者何居邵子曰此皆觀以  
人者非大觀也夫大觀以天觀以天者必於水之逝也  
之瀾也之渙也而後可以見道也故逝可以觀體瀾可  
以觀本渙可以觀文天下之大觀不在是歟客曰涉也  
濟也濯也謂之人可也若夫淺深順逆清濁非天其孰  
為之而謂之人乎邵子曰天人同道而異用者也故涉  
之於淺深濟之於順逆濯之於清濁有心則人無心則

天夫唯天也則體之在逝也本之在瀾也文之在渙也  
斯不為徒觀也而天下之大觀畢矣客曰夫觀則既聞  
命矣然軒者車之製也昔人蓋有以命夫室者舟而室  
名其室安在邵子曰盈天地間皆道也人唯無見苟有  
見矣則凡目之所接安往非逝也瀾也渙也乎身之所  
處安往非涉也濟也濯也乎由是觀之吾在吾舟猶在  
吾室也不然何足以為大觀哉客唯唯而退邵子遂筆  
之舟中以待再問者

戶部題名記代作

惟我聖祖稽周官司徒建戶部設尚書一人左右侍郎各一人以率其屬乃永樂七年己丑文皇帝北狩於是各行部戶曹之設十五年丁酉復設行在戶部至正統辛酉睿皇帝始定都邑去行在之名蓋戶部之有今署也更累朝若干年尚書暨侍郎凡若干人後以京儲事重特設侍郎以理之又若干人矣雖典籍具存然卒欲指數其名氏且不可得況其出處履歷之詳乎某承乏

尚書後懼自今將益散滅無所紀用是謀諸侍郎吳公  
原伯公鐘及黃公傑繙閱故牘備錄以刻諸石年序而  
階列名揭而蹟疏之且各虛其下方以俟來日某竊惟  
公署之有題名固將考往昔垂無窮以備文獻之傳抑  
所以起問者定品評而勸戒之意實寓乎其中蓋物聚  
則妍醜形焉事比則得失著焉人並則賢不肖判焉由  
數十載之後覽數十載之前愛憎既公誠偽亦著是是  
非非固有不能以毫髮爽者至於時有豐約勢有難易

而舒縮之間或有異論然知德者觀之亦自不可得而誣也夫君子之為善固不為名而沒世不稱聖人猶以為可疾名之所繫亦大矣況與賢同道則名罔不昌而身享天下之榮與不肖同迹則名罔不隳而身受天下之辱此豈待後世而後定哉是故夙夜兢惕鑒觀前人則所以殫吾職而熙明天子之績者於是乎在矣凡我同事越後之君子宜有所倣焉某不佞僭為之記

品士亭記

予昔為許嘗作品士亭於學宮蓋取其郡先儒靳裁之  
氏之說將與諸生共戒勉焉每當貢舉必觴于亭以相  
其志時予雖有學責然未專也比者奉命督學江西視  
前舉如為之兆者及蒞南昌分司顧其東隅有一亭而  
未名予謂是可以名品士矣遂名之惟許亭之始作也  
太史義興吳先生實為之記而予復書其碑陰謂士之  
品二道德其上功名次之而富貴云者宜斥不與大抵  
予之為說取諸靳氏而稍自異君子不以為過且妄也

今之於士也又何道以品之哉蓋亦要其上焉而已矣而次焉者亦與焉雖其初終表裏未必一致若難乎為品者然心誠求之不以毀譽不以利鈍不以隱顯操聖賢之律而槩之於其言行其殆所謂不中不遠者乎夫天下之須乎士者大矣士無他成物之德經世之猷憂時之慮三者備焉然後隨其所處蘊為道德發為功名異其用而同其體此皆所謂上也惟體不同而用有同者所謂次焉此之謂矣古稱才難正在於是而吾乃欲



百一求之以答明詔此夙懷所存非今日為然也豈徒  
品之云哉成者品之其未成者激昂之策勵之陶養之  
必欲登其上品焉顧雖次者且不可自畫而況其下乎  
予與諸生固當自省也於乎元氣不息才無古今盛世  
名邦於斯為最予雖踈陋愧於師道而所以副吾之望  
者必有其人矣作品士亭記

獨對亭記

弘治辛酉夏六月寶奉詔視學至南康白鹿書院是院

也勝在五老聞於四方乃負而弗鄉雖無大關繫然亦若缺典者故周覽之餘欲為亭以對之屬時暑雨未暇相度蓋越一年而後再至步自南岡歷於東崖得地丈餘其平如砥其崇如壇仰而西望五老當前若拱若揖若陟若降若在咫尺可延致與語者竊意亭宜於此諸生從者曰此文公先生舊遊也俯觀崖石有風泉雲壑四字寶乃欣然喜曰此先得吾意乎不於此亭烏乎為宜雖然五老之勝有目者共覩而非公莫之能當故以

獨對名亭重公迹也或謂峰以老稱不獨以秀以竒而以其壽是五老者天始與始地終與終壽孰對之謂公獨焉何居寶聞諸孔子仁者樂山山以氣凝而理行其中泉石土木無所非仁惟仁故靜惟靜故壽凡山皆然況其高且大者乎公仁者也純博中正德與山協為鎮為嶽五老之對固其所哉君子觀其進退語默從容暇豫既得公之靜矣則其化遠功深表儀流澤與孔孟無窮其為壽對諸五老必有能信之者况公前後代有寓

賢何莫不具一節至要其大孰與公比非公獨對其誰  
偕之是以危登極眺覽天下之至竒雄詞勁筆發天下  
之至秀彼以其五公以其一出象入神形於賦咏斯固  
公之餘事而所以作對者亦有在矣抑豈惟是哉公仁  
且智登斯臺也必嘗反而東顧深湖長江至于滄海皆  
公之大觀也寶生也晚幸讀公書見公所對如從公焉  
敢用窺測記於亭中九原可作不知公以為何如耶

新喻縣孔子廟門記

新喻縣孔子廟門壞弘治癸亥鄭知縣燾新之其材取諸淫祠其工取諸逸卒其雜物取諸羨役有顯大之觀久遠之規考成之日用祭菜禮告於聖靈退燕于學學之師生咸謂是役不可無記謂寶典在教也則來請文惟孔子王祀萬世廟用王制為門者二其在外曰靈星靈星內有門謂之大成壞而新之有司者常事耳在春秋魯復閔宮不書修泮宮亦不書為常事也而閔泮二頌猶存於詩詩春秋皆孔子筆也今廟於孔子莫非是

式由詩所載是門之新邑人自宜頌焉豈吾書之宜哉  
雖然廟為學立學也者風教之源也有司者之政實於  
是觀其興有慶其廢有讓憲典具在而寶則奉詔專蒞  
其事今於是役既率作省成以從良規又為圖諸不朽  
則凡有學之寄者於其敝缺也能不起而圖之乎以吾  
之書學春秋之不書蓋志也非頌也抑有風勸之道焉  
嗟夫吾夫子道在萬世其神在天而主與像則在廟主  
與像之所在神之所在也神之所在道之所在也是以

貴自王公賤至賤庶遠望其宮乘下步趨無敢少忽乃  
若進而門焉又當何如邪志美富之觀者於斯加悅修  
孚顒之容者於斯加敬寶嘗身親之矣於是執筆焉蓋  
不惟勵乎有司而又以見是門之為重也出入是者請  
敬誦之門壞於弘治某甲子而甚於某甲子今之新也  
始以春季某甲子終以秋仲某甲子凡三閱月而成璣  
應天江寧人由進士來為縣清敏而文知政所先而力  
能為之縣丞某主簿某典史某皆與有力教諭某訓導

金匱石室書  
卷十二  
某諸生某等則請記者也

一峯書院記

一峯書院者為故南京翰林脩撰羅公作也公以文章  
節行高天下天下之人莫不賢其為人其生也思詣其  
廬其歿也思造其祠者蓋十人而九也然永豐既居山  
中公之故第在水心去縣又若干里其墓在某地又去  
其第若干里若其舊遊所謂金牛書院者則又去其墓  
若干里而人跡益遠矣故凡至永豐者每以瞻拜無所



為恨予督學江西之三年始一至焉欲為文以弔其墓而雨雪載途不能往乃遣教諭某代以致之繼而步自學宮西偏得隙地若干丈遂屬吉安守張宗厚作堂三間中設公像題其門曰一峯書院俾人之苦於瞻拜者於此得少展焉雖然公之舊遊而詩書絃誦之地固公所以仰前修而迪後學者也時知縣鄭濬主簿某方勤修學之役吉安遂以委之不三月而告成某與訓導某請為之記惟公天資剛毅守道不回而充之以博養之

以正蚤貢於鄉已負重望及憲廟之初親擢進士第一其所對策雖制舉之常然援古證今指切本要詞嚴義正誦者起敬故程文未行而海內已錄傳之人之視公有漢董賢良之風焉既而入翰林為修撰未及數月即有扶持綱常之疏上忠於君以及輔相新進儒臣能為天下大計遠慮如此固非尋常摘劾之比論者方之唐子方其事似同而義則遠矣至其改官南都時忌者已去以公之望少假歲月公卿可待而竟以疾歸蓋公之

仕在行其道而不以位為榮王曾之志錢若水之節公寔有之觀於其退而其進可知也烏乎道之在人有正大之體有曲成之用自聖人以下多患不能兼之蓋其體不能協天下之一故其用不能周天下之殊即使幸有所成而正大者或病矣宣曲成之謂哉故觀士於今寧正大而有過毋寧曲成而無尤是則公之進言人曰太許君子曰忠公之去位人曰太激君子曰介固非誣且過也雖然公之心如青天白日公之德如高山大川

此天下之同稱也而才藝弗與焉則世亦不可謂不知公矣寶自童年游于庠序即知慕公及宦遊中外知公為詳誠有所謂願為執鞭而不可得者則於斯舉亦烏能後哉吾聞公晚癖金牛山水而忘其瘴厲竟以是終人之為天下惜公者或以是為公病公而有知其亦以為然歟故予既為之記復為招魂詞二章俾并刻焉弔公於斯者或一歌之庶乎公之來歸也詞曰公歸來兮金牛不可以居幽阻叢翳兮以魑以魍毒霧中人兮朝

弗夕虞什或一存兮虎豹之餘公氣則正兮神明被除  
彼倅從公兮將無避而句歸來歸來兮公有鄉閭公  
歸來兮泮水傍泮水源源兮溪流孔長拜者在庭兮衣  
冠在堂或羞而俎兮或醴而觴人歆公兮未央公不歸  
來兮誦吾章

瑞州府名宦鄉賢祠記

瑞州之境比多盜事聞於廷至命大臣來視當其時方  
作名宦鄉賢之祠議者或以為迂然是舉也前知府劉

璣用齊倡之今知府周津文濟繼而成之同知王相君  
卿則始終經理之觀其意顧若急務然者祠既成甘通  
判文紹施通判溥劉推官瑜乃屬高安知縣謝樞樹碑  
祠中請予為記且述或者之意以質於予予惟仕于斯  
謂宦莫非仕也而名者為難其難在政生於斯謂鄉莫  
非生也而賢者為難其難在德德以成化政以成治治  
振化流則天下可平而何有於一方也哉是故君子重  
之然治之善者自足以訓德化之醇者亦足以匡政論

名且賢於宦與鄉者斯其尚矣下是有一節焉亦皆不能泯也風聲流傳典型可想尸而祝之將使肅瞻敬對者在宦則名在鄉則賢以成治化庶後之視今猶今之視昔也祠之為道如此故雖國曲靡載而有之則備無之則闕蓋天下之通行也久矣可以盜故而廢之歟況宦有龔遂則有渤海之治鄉有陳寔則有潁川之化孔子曰斯民也三代之所以直道而行也有若人焉而盜弗息者吾弗信之矣今之論弭盜者其說非一轉移感

動吾以為固有在此而不在彼者然或內乏積誠外鮮  
孚信而徒逐其迹無恠乎人以為迂也若執是而遂謂  
夫祠之可緩抑豈通論哉夫名賢之祠非為弭盜立也  
而推本論之必至於是是則數君之舉誠知所務者矣  
祠之制同宮異列左為名宦凡若干人右為鄉賢凡若  
干人其間功德之偉亦有繫於天下者稱秩元祀國典  
存焉而復祠之為一方故句亦不為瀆也乃若其地在  
孔子廟傍朔望謁春秋享凡郡邑皆習行之而門序庭



階翼如森如與禮稱者吾以瑞為盛焉經始於弘治辛酉越甲子而畢時大叅濟南王公僉憲慈谿王公並繼守巡政刑兼舉威惠迭施盜以靖告祠之克成抑亦有自也已

文明閣記

弘治乙丑四月既望實行視武寧之學祇謁先聖禮畢退攝講坐以臨諸生既而觀於堂北有新閣焉

闕

--	--	--	--	--	--	--	--	--



--	--	--	--	--	--	--	--

瑞昌縣學遷建記

弘治癸亥瑞昌縣新作學宮又明年乙丑乃成考而居焉禮也學故在縣治西百步門臨於市之衢囂隘而塵邑之君子因其敝也議欲遷諸爽塏者久矣而未得其

地癸亥之歲前巡視都御史林公行縣至是詢諸吏士  
得遷學之說謁廟禮畢則及分巡僉憲慈谿沈君達觀  
厥基顧而謂曰是豈在他求哉後是百步而少右岡南  
沿北廟焉其可也廟之東為堂為齋又東為庖為廩為  
解館皆宜之沈君曰然相與計貲庸而授厥事於九江  
府推汪濬時寶方視學新喻公以書來致命寶拜公命  
之勤而申戒厥功焉高守友璣始至聞是舉也亟督知  
縣王顯宗畢事而僉憲天台王君繼蒞巡政益為規畫

用弘於初初公躬勸富室各助有差既或渝約功未用  
就今分巡僉憲姚江陳君以舊基予民取直焉足之而  
寶適以歲事至乃進民者某某其四人議加直於受  
地之家而益其疆未卒勸者俾以力輸凡得貲若干日  
役里一人稱其常役又贖有罪出錢以貸凡得庸若干  
於是邑有陳氏族大而禮其為諸生者居什之二請為  
衆先曰垣也某築池也某鑿道也某修各若干丈於貲  
力又凡省若干寶聞而喜曰林公與諸君之緒茲其可

成矣乃謂顯宗日程之濬月覈之而總厥功於守友璣  
是歲秋某月以成告學諭王某暨訓導韓某等請記惟  
古人之有居既奠則不輕於遷遷非得已也故詩書所  
稱商於耿殷周於幽洛皆此焉事今之邑古之國也學  
之有宮所以守典嗣訓成賢弘化其於邑也大矣而瑞  
昌之學乃市之與隣焉夫市也者利之所出也衆趨而  
聚不能不囂衆聚而居不能不隘衆居而溷不能不塵  
由是以為我絃歌講肄之擾非古人擇且卜焉之意也



遷其得已哉然遷之難居之尤難

闕

--	--	--	--	--	--	--	--	--

請初彭澤學在邑治東病之者謂背陽嚮昧位置弗當  
擇所宜徙乃得今之地說者曰前山為鞍為帽為髻後  
為鳳凰為綠梯為蒼崖為潛玉羣勝具萃左襟孤峯右  
帶重嶺而大江之流舉目望之盡數百里爽秀完敞學  
於是為稱時都御史林公以巡視至聞而然之分守叅

議董君分巡僉事沈君王君陳君繼廣其意而高守任  
焉以有茲成功也予嘗恠今師生之為學不務力本而  
以風水妨科名動輒請徙故多抑弗許然學之於治大  
矣而去陋就嘉亦有司常職此所謂同行異情者吾固  
弗敢廢焉於其成也能無慶乎雖然學所以學道也昔  
者孔子之語道多矣而直指親切莫如川上之嘆蓋合  
理氣顯微一言蔽之而所以為用功地者即是而在萬  
世之學道者此其的矣天下之大川四而江為首觀水

於江非他川比也今彭澤之學既據江為勝而吾夫子  
實像在廟凡為師生而從事於斯者盍相與追川上之  
遊求源於深擬進於漸期委於大脩為天德發為王道  
而慎獨以終始之則所謂道者蓋不假諸儒衆說而可  
自得於觀望之間矣今夫江自大禹疏鑿以來其起合  
流匯之道蓋未嘗一日改也或者不求其故顧於偏溪  
曲港力求通焉而曰入海由是雖東之之勢終有必至  
而支離已甚況徒勞而無歸者又徃徃是乎君子之於

道也何以異此夫志水者必自禹貢而後可得其真六  
經語孟吾道之禹貢也不是之務而安於偏曲雖亟稱  
於水亦於學乎奚有哉宮室之成古有頌禱頌禱於學  
舍道無可語者故於考成之餘擬取川流之旨為我師  
生告焉因高守請紀遂書俾刻之是役也總於推官汪  
濬勤於知縣王琦而訓術計琦者民某某則分理焉始  
弘治癸亥三月九日越二年乙丑四月一日而訖其費  
為白金八百兩出公帑者什四諸生暨富室助焉者什

六其工為顧匠若干人為庸徒若干人共若干日計其  
成為殿廡門堂齋館庖廩解榭諸屋以楹計者八十墻  
以堵計者若干街以步計者若干君子謂於舊學為偉  
蓋一邑之盛事其在郡則二學後先告成不出數月尤  
足為諸邦起廢之倡是皆不可畧也

浮梁縣學記

凡學之設其道有四一曰習典章二曰明經訓三曰博  
風俗四曰育人才斯四者實古之道而今制亦弗能外

焉故典章存乎誥令經訓存乎詩書風俗存乎儀式人才存乎貢舉其槩如此世之人徒見科目足以階貴遂謂夫學專為育人才而於所謂典章之習經訓之明風俗之惇判然若無所與故其官也非謂風水有妨於科目則不脩舉不特有司為然而觀風君子亦莫之異嗚乎其亦不思爾矣今科目為入仕之途自皇朝公卿以至內外百吏胥由是出蓋天下之極選而人人慕望焉者承平以來學徒日益廩增常員之外附學為名者多



至倍蓰其山林儒士挾藝以應試者亦如之由是而觀  
雖微學也未嘗無人才也然則學將可廢邪惟學有典  
章經訓風俗之繁而不止於人才人才之生必是之育  
而後身心性情有所持循檢飭以為天下國家之用是  
以國有學而能國郡有學而能郡邑有學而能邑否則  
於制為缺缺於制是缺於道也今罔攸式古罔攸稽化  
塞於下而賦竭於上天喪人紀孰與立之故學圯則起  
荒則理壞則葺奠謁飲射講歌游肄無廢乃已此固有

司常職怠是者罰將及之於科目利弗利何有哉浮梁縣學之建久矣弘治己未火庚申新之癸亥落成寶謂其得脩舉之常當記成蹟乃屬知縣左輔暨教諭張洪等請文於今御史大夫前大司寇戴公繼而有傳公語命寶者寶弗敢當而重違公命也敢著是論而以歲月附焉若夫敷宣聖明文教之懿以申飭我師生公為鄉邦先達且嘗宗師斯文其何辭辭之凡新作大成殿東西廡戟門明倫堂二齋某等屋若干間其仍而飾者不

與是數用木若干石若干磚若干瓦若干鐵若干他物  
數各稱是始議者知府李復貞而侯知府溪茹同知鑿  
阮推官韜終之教諭某某訓導某某寔申告成之請督工  
某某官者民某某亦與有勞皆當附書謹書以伺

南昌府學上達之閣記

弘治乙丑春南昌知府祝惟容作重屋於學宮當齋之  
西館舍之南饌堂射圃之北俾諸生朝夕脩肄之暇登  
而觀焉盖取古人游息之意也陳推官察間率訓導董

尊請名於予予愛其軒窓虛敞迴出羣構四望清遠有  
高明之觀故為之題曰上達之閣而教授王德明適至  
則與訓導盛杲黃奉黃昂復請為記而江同知昌刻之  
予惟君子上達此孔子之言也宋儒為之說曰君子循  
天理故日進乎高明夫高也明也上之謂也然而進焉  
者鮮何也人欲害之也天理人欲同形異情其端甚微  
而其究甚遠是故君子慎厥志焉無志者不足道有志  
而自畫則陋自滿則淺自放則荒去是數者而後可以

言志志以始之力以至之化以終之其間用力之方或以顏之明健或以曾之弘毅而其歸未嘗不同也高明上達其道如此夫何與於斯閣而強以是名哉夫人有所見則有所感感極而反身以脩凡游息之際一景象莫非德業之助而況其大者乎故海興望洋山起仰止廟朝則敬墟墓則哀隱於蹈井而懼於臨淵蓋情之所發有不能已者然則君子登斯閣也獨無感乎哉今夫登斯閣而感其高則知循理之高有大於是而凡

徇欲之卑必求去之矣登斯閣而感其明則知循理之  
明有大於是而凡徇欲之污必求去之矣是則一瞻望  
間而大有相於吾志以為力且化焉之地閣以觀建而  
志可以興故吾斯名閣因以觀示教焉雖然觀一也而  
所以觀者則存乎人人苟不能自反而徒資覽眺之勝  
抑亦未於觀矣吾敢以是望諸生哉天下之學同歸於  
教而南昌特望自兩京國監外衣冠禮樂之盛談者先  
之上達之志夫人有焉宜吾不能不厚望之也昔者予

在白鹿書院文諭諸生有曰學者立心辯莫先於義利  
幾莫大於誠偽斯二言者蓋不異此諸生試更以是叅  
之是為記

遊梅巖洞記

自樂平之之德興也道出某地遠見一山高十丈餘其  
狀特異問之曰梅巖也行數里巖漸近縣令鄒泰請往  
觀之遂至山下數竒石離立輿從石中上入洞門門闊  
十餘丈釋輿而步秉燭前導稍曲而左隆然如入室焉

當承宇處石有如筭者如茵者如珊瑚琅玕者累累下懸如將墜然下近壁處有石鱗鱗區分級列如或疆之號仙人田又右而行又如一室室之頂垂石折盤如龍蛟之耳中一竅水滴滴注當注處石承之圓如井闌崇如柱礎中一竅與上竅對水滿則溢又右而行地漸高有石如舟者在左如棋者在右地漸寬平如階以升其上蓋揭鐘懸蓋宏而虛如亭之狀左右穴各一天光照焉出之則山顛也泰請賦賦詩二章刻於石云



潁州修學記

凡我政人胥會而論焉莫不曰學政之先也敝必修之  
然有力焉有財焉財詘不可以舉力罷不可以役亦夫  
人之通論也贏於詘而優於罷稽諸制而合焉斯則存  
乎人而不可常例視之者也厥惟艱哉潁州儒學自宋  
景祐間始建於西湖之上我朝洪武初因而再建未幾  
圯於河水乃徙於南城內至是蓋百五十年矣蕪穢弗  
治見者嘆焉而未有能修之者正德壬申夏六月遼陽


孫君伯堅以河南按察僉事奉璽書飭兵於斯地方千里皆屬控制而鎮實在潁始至之三日視學而見其廢其嘆也視諸人人加甚乃召州衛官吏師生議而修之於是北方群盜奔突於淮汝間所至屠戮極其慘烈郡邑守令方議戰守不暇則何暇及是哉蓋財之誣力之罷莫甚於此時者矣伯堅之言曰禦賊莫先於戰守戰以勇克守以恒持勇與恒忠義之所發也倡忠義者存乎教化敦教化者存乎庠序荒於素而欲復於遽吾固

知其不能也然吾聞諸孟子七年之病求三年之艾不  
畜不得由是觀之則夫學也烏可以賊故而廢之或謂  
伯堅財惡取曰取諸淫祠則有餘材力惡取曰取諸休  
卒則有餘工雜泛之用又惡乎取曰取諸薄罰則有餘  
需衆皆曰然遂卜日興事訓練撫綏之餘寢食以焉不  
三月而告成皆不愆其素所謂贏於詘而優於罷者非  
此謂耶學正其等以伯堅意為書來請記予惟潁中州  
要害自古則然我聖祖龍興濠梁今為中都而是地寔

惟附翼衣冠絃誦四方萬國宜是焉先今一廢至此觀於其所而其道可知也或者猶詭詭焉以武之衰歸之文盛夫文經乎天緯乎地化成乎人者也武何物也而焉能並之雖然文事武備蓋有並以為言者譬之貞以配元義以配仁用雖殊而體未嘗不一也故出入將相皆吾儒事而受成獻馘必於學焉武略之不競吾將文德之弗崇是懼而可以盛衰論乎立政曰克詰戎兵方行天下罔有不服以觀文王之耿光以揚武王之大力

夫戎兵武也。以之方行而覲焉。揚焉。非文德何以與此。伯堅素抱遐邃。茲焉離艱。當劇乃能先庠序教化。以倡忠義。可謂知所本矣。予知伯堅久且嘉其事之成也。故為記之。學之堂曰明倫。天下之同名也。飲讀賓興。皆於斯在。故是之先堂。左右有齋肄也。於是西南為膳堂。養也。於是東北為鬻舍。宿也。於是故繼之。是皆謂修堂後為尊經閣。制書在焉。上下五楹。間視禮殿。高數尺外。而廨宇倉廩庖湍。皆具。是皆謂作然。皆制也。亦謂之脩始。

於某月某日越十月某日落之廟之脩也蓋同時而先考焉別有記者不書



容春堂前集卷十二